

Naqqiut

Siunnersuut UKA2025/85 15. september 2025-meersoq taarserpaa.
(**Saqqummiussiisummi siunnersuuteqartup aqqi naqqiutigineqarpoq**)

Uunga siunnersuut Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat

(Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)

(Inatsisartuni eqimattak, Naleraq)

Saqqummiussissut**Siullermeerneqarnera**

Ulloq 25. marts 2023 Kalaallit Nunaat nalunaaquttat ingerlaqatigiiffiannut UTC -3-mit UTC -2-mut ikaarsaariarpoq, taamaalillunilu nalunaaqutaq nalunaaquttap akunneranik ataatsimik siuartinneqarluni. Ittoqqortoormiilli nalunaaquttap ingerlaqatigiiffiannut UTC -1-imit UTC -2-mut ikaarsaariarpoq, taamaalilluni nalunaaqutaq nalunaaquttap akunneranik ataatsimik kinguartinneqarluni.

Innuttaasut ikigisassaanngitsut nalunaaquttat ingerlaqatigiiffiat nutaaq ajornartorsiutitut misigisimavaat nunanilu allani misissuisarsimanerit takutippaat nalunaaquttap seqerngullu kaavinnera imminnut naapertuutinngikkaangata peqqissutsimut kingunerluuteqartarsinnaasoq. Ajornartorsiutit aamma taakku aasaanerani nalunaaqutaqartitsinermik aqqissuussinermut atuupput. Aqqissuussineq taanna malillugu piffissami marsimi sapaammi kingullermiit oktobarimi sapaammut kingullermut nalunaaqutaq siuartinneqartarpoq.

Siunnersuutip malitsigisaanik Kalaallit Nunaat nalunaaquttat ingerlaqatigiiffiannut UTC -3-mut uterluni ikaarsaariassaaq aammalu aasaanerani nalunaaqutaqartitsisarnermik aqqissuussisarneq atorunnaarsinneqassalluni. Tamanna nalunaaqutaq nalunaaquttap akunneranik ataatsimik kinguartinneqarnissaanik isumaqarpoq. Taamaasilluni nalunaaquttap seqerngup pinngortitalu namminerisamik kaavinnerat malilissallugu. Seqerngup qullasinnerpaaffiata nalaani nalunaaqutaq 12:00-miittalissalluni. Ukiorlu naallugu nalunaaqutaq ataasiinnaq nikisinneqarneq ajortoq atuutilissalluni.

Sumiiffiit Qaanaaq, Tasiilaq Ittoqqoormiillu eqqarsaatigalugit siunnersuutigineqarpoq sumiiffinnut taakkununga nalunaaqutaq ingerlaqatigiiffii najukkani innuttaasut

tusarniareerlugit nalunaarutikkut aalajangersarneqassasut.

Tusarniaanermi arlaqangaatsiartut akissuteqaateqarsimapput, tassanngalu akissuteqaat ataaseq issualaarniarpara:

“Massakkut seqineq qullasinnerpaagaangat nalunaaqutaq 14:30 missaani inissisimasarpoq Kalaallit Nunaata kitaani. Tamanna equngalluinnarpoq.

Nunarput nunarsuarmi tassani inissisimavoq, tamannalu inuiaqatigiit naleqqussarfigisariaqarpaat.

Toqqaannaq pinngortitamit inuussutissarsiortuusunut namminerisamik imatut nassuiarneqarsinnaavoq: Uumasut nalunaaquttat ingerlaqatigiiffiit soqutiginnigilaat pinngortitallu nammineq ingerlaarnera malittarlugu. Uagullu inuujuarnikuuvugut pinngortitap ulluinnarni periusai malillugit.”

Ilumoorinnaanngilaq uagut Kalaallit Nunaanniittuusugut Danmarkip nalunaaqutaanut naleqqussassasugut nalunaaquttat nikinganeri akunnernik sisamaniit akunnernut pingasunut apparlugit. Aningaasatigunngooq aammalu allaffimmiut ulluinnarni Danmarkimut attaveqartartunngooq iluaqutaanera sakkuliuullugit. Tamanna pivoq piniartut aalisartullu nunatsinniittut pilliutigalugit, ingammik ukiaanerani qaammarseerujussuaqqaartartut avalassinnaanarlutik. Taakku ullut tamaasa akunnernik suliffissaraluaminnik annaasaqartarput.

Atuarfinni ilinniartitsisut maluginiarpaat atuartut atuariartalersimasut kajumissuseqannginneralutik sinimmik amigaateqartarnertik peqqutigalugu. Unnukkummi sininneq sapilertarput timaat seqerngup ingerlaarnera malinniartaramikku. Ullaakkullu makittariaqartarlutik sulii seqineq qullaqqajanngitsoq.

Pinngortitaq ataasioqatigalugu inuujuarnikuuvugut seqerngup kaavinnera ulluinnarni malittuarlugu. Tamannalu uterfigisariaqarparput immitsinnut ataqqiniarluta.

Taamatut oqaasertalerlugu immikkoortoq Inatsisartuni suliarineqartussanngortinneqarpoq.